

Benny Nisbet:

Pueblo di San Nicolas preocupa cu Calypso y Roadmarch Contest ta bay playa

ORANJESTAD (AAN): E siman aki, Benny Nisbet di PPA como Miembro di Parlamento, a informa Ministro Ramon Lee, y a haci un suplica na dje, pa intermedia pa mantene "Calypsonian y Roadmarch Contest" na San Nicolas.

Segun Nisbet di PPA, si mester usa medio publico pa yega na un entendimiento, anto asina lo mester ta! Cambio ta mishi cu e dignidad di e pueblo di San Nicolas y vecindario!

Esaki ta e carga cu Nisbet a manda pa Ministro Ramon Lee:

"Den mi calidad di miembro di Staten di Aruba, mi ta acercabo cu e siguiente preocupacion, cu na mismo tempo ta un preocupacion grandi cu ta biba den e pueblo di Aruba, muy en especial e pueblo di e parti pariba di nos Isla, esta San Nicolas y vecindario.

Esaki tin di haber cu e asina yama Calypsonian y Roadmarch Contest cu a origina den San Nicolas y pa añanan largo a worde organiza na San Nicolas, na Lago Sport Park despues yama Joe Laveist Sportpark cual actividad e organizacion di S.A.C. lo tin intencion di organiza na Oranjestad e viaha aki.

E actividad aki pero a la vez e calypso/Roadmarch ta forma parti di e cultura cu e gruponan ingles cu a labora na LAGO a trece cu nan nos Isla y awe ta forma un parti integro di e bida cultural arubano. (Calypso/Roadmarch-steelband-brassband etc). Lastima nos a perde e steelband y brassband, ta masha poco tin actualmente compara cu antes.

Aki tin espacio pa un proyecto pa reviva nos steelband y brassband como parti

di nos cultura!

E calypso/roadmarch ta forma parti di e historia arubano y muy enespecial di San Nicolas cual distrito tin un historia un tiki otro cu e otro districtonan como cu den e decada 30 padilanti gran parti di esnan cu a bini pa labora den e refineria a establece nan mes den San Nicolas y vecindario.

E cultura(nan) cu a bini cu e gruponan aki hunto cu e cultura arubiano ta forma e fundeshi riba cual nos pueblo en general y e pueblo di San Nicolas en particular ta funciona tur dia. E fundeshi aki ta nos orguyo, ta nos dignidad. E cultura aki ta e fundeshi/raiz di locual nos ta awe, esta un parti integral di e comunidad Arubano.

E hecho cu fundacion di carnaval pa nan motibonan kier laga e actividad di calypsonian/roadmarch contest tuma lugar na Oranjestad en vez di na San Nicolas den Joe Laveist sportpark ta mishi cu e orgullo y dignidad di e pueblo di San Nicolas. E ta affecta y sacudi e historia y e fundeshi di esnan cu a establece nan mes na Aruba, contribui na Aruba, mira nan sernan keru muri na Aruba y di cual nan desendientenan ta sigui forma parti integral di nos comunidad Arubiano. Pesey den mi calidad di miembro di Staten mi kier a haci un apelacion publico na bo persona den bo calidad di Ministro di Cultura pa intermedia pa asina e actividad di "calypsonian y roadmarch contest" por sigui tuma lugar na unda el a origina esta den pueblo di San Nicolas.

Pa basta siman cu e asunto aki ta den discusion mi a mantene mi mes for di e discusion publico, como mi ta hana cu carnaval su meta ta

pa UNI nos pueblo pa un celebracion NACIONAL di nos pueblo, mientras cu un discusion politico hopi vez ta logra net lo contrario. Sinembargo durante mi movicion den pueblo durante dianan di fiesta, muy enespecial na San Nicolas mi por a sinti cu e preocupacion rond di e asunto aki ta biba cu dolor y esaki hopi y profundo.

E pueblo di San Nicolas ta sinti cu pa cierto organizacion nan lo no ta conta y cu cierto organizacion lo ta sinti cu nan por trapa e comunidad di San Nicolas ki ora cu nan hana ta bon y kitamento di e actividad di "calypso y roadmarch" lo ta solamente un ehempel mas di esaki.(steelband y brassband a worde kita promer caba !)

Ta hopi ciudadano cu ta desea cu un voz fuerte rezona a haci un apelacion riba mi pa trece nan preocupacion padilanti asina cu aña 2003 habri.

Finalmente mi kier a haci sr. Ministro Lee un suplica publico pa intermedia y si mester haci uso di "fondo publico" pa sostene S.A.C. di tal forma cu no mester di hala e "calypsonian/roadmarch" contest for di San Nicolas(Joe Laveistsport park) pa ningun otro sitio riba nos Isla, haci esaki tambe. Sperando cu dentro di bo maneho riba tereno cultural tin espacio pa reconoce e contribucion historico y cultural di tur grupo cu a forma y ta form parti di nos comunidad Arubano. Y cu dentro di e reconocimiento aki keda reconoce e sitionan(districtonan) unda cierto cultura a haci su entrada na Aruba como e sitio pa keda recorda esaki pa medio di e.o. e concursionan musical manera "calypsonian & roadmarch contest" y otro concursionan.

Sr. Ministro Lee, acepta e carta aki di un miembro di Staten cu ta kere fielmente den Union di nos pueblo na tur momento, mas ainda celebracion di nos fiesta Nacional Carnaval, pero na mes momento ta kere den keda re-

conoce e diferente districtonan/sitionan y gremionan cu a contribui den curso di anas na haci Aruba locual e ta awe, one happy island. Ban purba duna contenido na locual nos ta propaganda den exterior.

Diario. - (6 januari 2003) ; p.24